

福嚴校友會「第五次佛學研習營」

《大智度論》之譬喻

(釋厚觀，2014.10.02，福嚴校友會)

一、親近善知識，敬師如佛

(一)《大智度論》卷 49〈20 發趣品〉(大正 25，414b21-c24)：

**1、若人憍心自高，則法水不入；若恭敬善師，則功德歸之**

「信師恭敬諮受」者，菩薩因師得阿耨多羅三藐三菩提，云何不信恭敬供養師？雖智德高明，若不恭敬供養，則不能得大利。

譬如深井美水，若無綆<sup>1</sup>者，無由得水。若破憍慢高心，宗<sup>2</sup>重敬伏<sup>3</sup>，則功德大利歸之。

又如雨墮，不住山頂，必歸下處；若人憍心自高，則法水不入；<sup>4</sup>若恭敬善師，則功德歸之。

**2、依止善師，戒、定、慧、解脫皆得增長**

復次，佛說依止善師，持戒、禪定、智慧、解脫，皆得增長；譬如眾樹依於雪山，根、莖、枝、葉、華、果，皆得茂盛。

以是故，佛說：「於諸師宗<sup>5</sup>，敬之如佛。」

**※ 因論生論：云何於惡師恭敬供養，視師如佛**

問曰：惡師云何得供養信受？善師不能視之如佛，何況惡師！佛何以故此中說「於諸師尊如世尊想」？

答曰：

**(1) 唯取其善，不計其惡**

菩薩不應順世間法。順世間法者，善者心著，惡者遠離；菩薩則不然，若有能開釋深義、解散疑結，於我有益，則盡心敬之，不念餘惡。

如弊囊盛寶，不得以囊惡故，不取其寶；又如夜行嶮道，弊人執炬，不得以人惡故，不取其照。菩薩亦如是，於師得智慧光明，不計其惡。

**(2) 念師方便示現惡事**

復次，弟子應作是念：「師行般若波羅蜜，無量方便力，不知以何因緣故有此惡事？」如薩陀波崙聞空中十方佛教：「汝於法師，莫念其短，常生敬畏！」<sup>6</sup>

<sup>1</sup> 綆(《ㄨ》): 1.繩索，汲水器上的繩索。(《漢語大詞典》(九)，p.858)

<sup>2</sup> 宗：9.尊重。亦謂推尊而效法之。(《漢語大詞典》(三)，p.1347)

<sup>3</sup> 伏：12.通“服”。佩服，服氣。(《漢語大詞典》(一)，p.1180)

<sup>4</sup> 參見《法句譬喻經》卷 1〈3 多聞品〉：「若多少有聞，自大以憍人，是如盲執燭，照彼不自明。」(大正 4，579a7-8)

<sup>5</sup> 宗：5.指某一類事物中有統領楷模作用或為首者。6.謂作宗主或作首領。(《漢語大詞典》(三)，p.1347)

<sup>6</sup> 《摩訶般若波羅蜜經》卷 27(大正 8，416c6-9)，《道行般若經》卷 9(大正 8，470c18-472a11)。

**(3) 但欲自益，不論彼過**

復次，菩薩作是念：「法師好惡，非是我事；我所求者，唯欲聞法，以自利益。如泥像、木像無實功德，因發佛想故，得無量福德；何況是人智慧方便能為人說！以是故，法師有過，於我無咎。」

**(4) 觀法性空，無妄分別**

「如世尊想」者，我先說：「菩薩異於世人。」  
世人分別好醜——好者愛著，猶不如佛；惡者輕慢，了不<sup>7</sup>比數<sup>8</sup>。  
菩薩則不然，觀諸法畢竟空，從本已來皆如無餘涅槃相；觀一切眾生，視之如佛，何況法師有智慧利益！以能作佛事故，視之如佛。

(二)《大智度論》卷 96 (大正 25, 733a26-c19):

如藥師為病者說服藥法，「汝能如法服，病則得差<sup>9</sup>。」……

**1、勸當知恩，視師如佛**

「於師生佛想」，以能教佛道因緣故。

世間小人<sup>10</sup>，因緣事訖，則忘其恩義，作是念：「如人乘船度水，既到彼岸，何用船為？」

是故說：「汝當知恩！應作是念：『所從聞般若者，即是我善知識。』」

一切諸利中，般若利最勝；行是般若，疾得阿耨多羅三藐三菩提不退轉。

又復行般若因緣故，親近諸佛，常生有佛國中，離於八難<sup>11</sup>，值佛在世。

菩薩應作是念：「我得如是等諸功德，皆從般若得；般若波羅蜜從師而得，是故視師如佛想。」……

**2、誠**

**(1) 莫以世利心隨逐法師**

有人能說般若波羅蜜者，有大福德，多知識，多得供養；弟子初為般若故隨逐，後漸漸為供養利。是故說：「莫以世利故隨逐法師。」

**(2) 勿見師過，當觀諸法實相無垢無淨**

問曰：何以不但說親近善知識，而說是種種因緣？

答曰：

**A、知師方便受五欲**

有人既得善知識，不得其意，反成讎隙<sup>12</sup>而墮地獄，更相謗毀故。  
唯佛一人無有過失，餘人誰能無者？

<sup>7</sup> 了不：絕不，全不。(《漢語大詞典》(一)，p.722)

<sup>8</sup> 比數(尸又、)：相與並列，相提並論。(《漢語大詞典》(五)，p.269)

<sup>9</sup> (1) 差=瘥【宋】【元】【明】【宮】。(大正 25, 733d, n.6)

(2) 差(彳丿、)：病除。(《漢語大詞典》(二)，p.973)

<sup>10</sup> 小人：5.識見淺狹的人。6.人格卑鄙的人。(《漢語大詞典》(二)，p.1586)

<sup>11</sup> 《長阿含經》卷 9 (10 經)《十上經》(大正 1, 55c5-21)。

<sup>12</sup> 讎隙：仇恨，怨恨。(《漢語大詞典》(十一)，p.907)

若弟子見師之過——若實、若虛，其心自壞，不復能得法利。

是故空中聲教：若見師過，莫起嫌恨！

汝應作是念：「我先世福德不具足故，不得值佛，今值是雜行師；

我不應念其過失，而自妨失般若！師之過失，不著於我，我但從師受般若波羅蜜法。」

如狗皮囊盛好寶物，不應以囊故而棄其寶；

如罪人執燭照道，不可以人罪故不受其明，自墜溝壑<sup>13</sup>；

又如行，遣<sup>14</sup>小人<sup>15</sup>導道，不可以人小故不隨其語。

如是等因緣，不應遠離於師。……

### **B、觀諸法實相無垢淨**

復有諸菩薩通達諸法實相故，無所障礙、無有過罪；雖作過罪，亦無所妨。

如人年壯力盛，腹中大熱，雖食不適飲食，不能生病；又如有好藥，雖被<sup>16</sup>惡毒，不能為害。

### **C、結**

如是等因緣故，「汝於師所，莫起嫌恨而自失般若！」如經中說。

### **(3) 若師對求法者都不顧念，亦莫生怨恨**

復有說法者持戒清淨、離於五欲、多知多識、有好名聞、威德尊重，弟子受<sup>17</sup>法而不顧錄<sup>18</sup>，「汝於是中莫生怨恨！當作是念：『我宿世罪故，今為小人<sup>19</sup>；師不輕我，我自無福，不能得<sup>20</sup>道。又我於師所，應破憍慢，以求法利。』」

有如是等種種諸師，菩薩為求般若波羅蜜故，但一心恭敬，不應念其長短<sup>21</sup>。

若能如是忍辱、於師一心不起增減者，汝於師所盡得妙法；如完牢之器，所受不漏。

<sup>13</sup> 溝壑：1.山溝。(《漢語大詞典》(六)，p.3)

<sup>14</sup> (1) 遣=道【宮】。(大正 25，733d，n.15)

(2) 遣：1.派遣，差遣。(《漢語大詞典》(十)，p.1135)

(3) 行遣：處置，發落。宋 蘇軾《與朱鄂州書》：“若依律行遣數人，此風便革。”(《漢語大詞典》(三)，p.915)

(4) 印順法師，《大智度論》(標點本)，p.3589：「遣」疑是「遠」字之誤。

(5) 案：若作「遠」，則標逗為「又如行遠，小人導道」。

<sup>15</sup> 小人：8.舊指僕隸。《論語·陽貨》：“唯女子與小人為難養也。”朱熹集注：“此小人亦謂僕隸下人也。”9.小孩子。(《漢語大詞典》(二)，p.1586)

<sup>16</sup> 被：12.蒙受，遭受，領受。(《漢語大詞典》(九)，p.55)

<sup>17</sup> 受：3.習學。(《漢語大詞典》(二)，p.880)

<sup>18</sup> 顧錄：顧念收納。(《漢語大詞典》(十二)，p.365)

<sup>19</sup> 小人：2.舊時男子對地位高於己者自稱的謙詞。4.古時老師對學生的稱呼。《孔子家語·觀周》：“孔子既讀斯文也，顧謂弟子曰：小人識之，此言實而中，情而信。”(《漢語大詞典》(二)，p.1586)

<sup>20</sup> 道=近【宋】【元】【明】【宮】【聖】【石】。(大正 25，733d，n.20)

<sup>21</sup> 長短：3.長處和短處。7.高和下，優和劣。(《漢語大詞典》(十一)，p.599)

## 二、隨憶念受報

《大智度論》卷 24〈1 序品〉(大正 25, 238b12-29):

**是業能與種種身，如工畫師作種種像。**<sup>22</sup>

若人以正行業，則與好報；若以邪行業，則與惡報。如人事王，隨事得報。如是等分別諸業相果報。

復次，如《分別業經》<sup>23</sup>中，佛告阿難：「行惡人好處生，行善人惡處生。」

阿難言：「是事云何？」

佛言：「惡人今世罪業未熟、宿世善業已熟，以是因緣故，今雖為惡而生好處；或臨死時，善心心數法生，是因緣故，亦生好處。

行善人生惡處者，今世善未熟、過世惡已熟，以是因緣故，今雖為善而生惡處；或臨死時，不善心心數法生，是因緣故，亦生惡處。」

※ **臨死時心極為有力，勝終身時力** (印順法師，《大智度論筆記》[C011] p.203)

問曰：熟、不熟義可爾；臨死時少許時心，云何能勝終身行力？

答曰：是心雖時頃少，而心力猛利；如火、如毒，雖少，能成大事。

是垂死時，心決定猛健故，勝百歲行力；是後心名為大心，以捨身及諸根事急故。如人入陣，不惜身命，名為健；如阿羅漢捨是身著故，得阿羅漢道。

## 三、如是因，如是果

(一) 若不想得到不好的果報，就要遠離不好的因

《大智度論》卷 77〈63 等學品〉(大正 25, 606c16-25)

菩薩如是學者，

常有慈悲憐愍心，不惱眾生故，不墮地獄；

常觀因緣諸法實相，不生愚癡故，不墮畜生；

常行布施，破慳貪心故，不生餓鬼中。

佛所說十二部經、八萬四千法聚，常不悞惜故，不生邊地。

常供養尊長、善人，破憍慢故，不生旃陀羅等下賤人中。

深心愛眾生，具足行利益事故，受身完具。

以善法多化眾生故，眷屬成就，終不孤窮。

深愛樂尸羅波羅蜜故，不行十惡道及以邪命。

(二) 不生下賤家，不生八難處

《大智度論》卷 73 (大正 25, 572a17-19):

求道破憍慢根本故，常不生下賤家。

不障他功德，常行勸助故，不生八難處。

<sup>22</sup> (1) 業如工畫師。(印順法師，《大智度論筆記》[C011] p.203)

(2) 參見《正法念處經》卷 5 (大正 17, 23b18-c2)。

<sup>23</sup> 參見《中阿含經》卷 44 (171 經)《分別大業經》(大正 1, 706b12-708c28)。

#### 四、人身難得，佛法難聞

(一)《大智度論》卷9〈1序品〉(大正25, 125c9-19):

佛與阿難入舍衛城乞食，是時有一貧老母立於道頭。阿難白佛：「此人可愍，佛應當度。」佛語阿難：「是人無因緣。」

阿難言：「佛往近之，此人見佛相好光明，發歡喜心，為作因緣。」

佛往近之，迴身背佛；佛從四邊往，便四向背佛，仰面上向；佛從上來，低頭下向；佛從地出，兩手覆眼不肯視佛。佛語阿難：「復欲作何因緣？」

有如是人無度因緣，不得見佛。以是故佛言：「佛難得值，如優曇波羅樹華。」

**譬如水雨雖多，處處易得，餓鬼常渴，不能得飲。**

(二)《大智度論》卷8〈1序品〉(大正25, 116b21-c6):

當今眾生，生在惡世，則入三障中！

生在佛後，不善業報，或有世界惡罪業障，或有厚重結使障。墮在佛後，人多為厚重結使所障：或婬欲薄而瞋恚厚，瞋恚薄而婬欲厚，婬欲薄而愚癡厚，愚癡薄而瞋恚厚，如是等展轉互有厚薄。是結使障故，不聞、不知化佛說法，不見諸佛光明，何況得道！譬如日出，盲人不見，便謂世間無有日月，日有何咎！又如雷電震地，聾人不聞，聲有何過！

今十方諸佛常說經法，常遣化佛至十方世界說六波羅蜜，罪業盲聾故，不聞法聲；以是故不盡聞見。雖復聖人有大慈心，不能令皆聞、皆見。若罪欲滅、福將生者，是時乃得見佛聞法。

#### 五、不貪求供養，得供養不喜，失供養不憂

(一)《大智度論》卷5(大正25, 96b17-18):

若人供養我，我若喜受者，我福德則薄，他人得福亦少，以是故不喜。

(二)《大智度論》卷14(大正25, 165a13-b10)

**念三種得供養而自伏心**(印順法師，《大智度論筆記》〔A035〕p.65)

復次，供養有三種：

一者、先世因緣福德故；

二者、今世功德，修戒、禪定、智慧故，為人敬養；

三者、虛妄欺惑，內無實德，外如清白，以誑時人而得供養。

##### **1、因先世因緣福德而得供養**

於此三種供養中，心自思惟：「若先世因緣懃修福德，今得供養，是為懃身作之而自得耳，何為於此而生貢高？譬如春種秋穫，自以力得，何足自憍？」如是思惟已，忍伏其心，不著、不憍。

##### **2、因今世功德而得供養**

若今世功德故<sup>24</sup>而得供養，當自思惟：「我以智慧，若知諸法實相，若能斷結，

<sup>24</sup> 《大正藏》原作「若今世故功德」，今依《高麗藏》作「若今世功德故」(第14冊, 519b16)。

以此功德故，是人供養，於我無事。」如是思惟已，自伏其心，不自僞高；此實愛樂功德，不愛我也。

譬如：罽賓三藏比丘，行阿蘭若法，至一王寺，寺設大會，守門人見其衣服麤弊，遮門不前。如是數數，以衣服弊故，每不得前，便作方便，假借好衣而來，門家見之，聽前不禁；既至會坐，得種種好食，先以與衣。眾人問言：「何以爾也？」答言：「我比<sup>25</sup>數來，每不得入，今以衣故得在此坐，得種種好食，實是衣故得之，故以與衣。」

行者以修行功德，持戒智慧故而得供養，自念：「此為功德，非為我也。」如是思惟，能自伏心，是名為忍。

### 3、以虛妄欺惑而得供養

若虛妄欺偽而得供養，是為自害，不可近也！當自思惟：「若我以此虛妄而得供養，與惡賊劫盜得食無異，是為墮欺妄罪。」

如是於三種供養人中，心不愛著，亦不自高，是名生忍。

## 六、持戒之利益

《大智度論》卷 13〈1 序品〉(大正 25, 153b22-154a28)

### (一) 戒為一切善法住處

若人求大善利，當堅持戒，如惜重寶，如護身命。何以故？

譬如大地，一切萬物有形之類，皆依地而住；戒亦如是，戒為一切善法住處。

### (二) 若不持戒，空無所得；若能持戒，得生好處及得道果

復次，譬如無足欲行，無翅欲飛，無船欲渡，是不可得；若無戒欲得好果，亦復如是。

若人棄捨此戒，雖山居苦行，食果服藥，與禽獸無異。或有人但服水為戒，或服乳，或服氣；或剃髮，或長髮，或頂上留少許髮；或著袈裟，或著白衣，或著草衣，或木皮衣；或冬入水，或夏火炙；若自墜高巖，若於恒河中洗；若日三浴，再供養火——種種祠祀，種種呪願，受行苦行；以無此戒，空無所得。

若有人雖處高堂大殿，好衣美食，而能行此戒者，得生好處及得道果。若貴若賤，若小若大，能行此淨戒，皆得大利。若破此戒，無貴無賤，無大無小，皆不得隨意生善處。

### (三) 貧賤而能持戒，勝於富貴而破戒者；持戒之人，具足安樂，名聲遠聞，天人敬愛，所願皆得

復次，破戒之人，譬如清涼池而有毒蛇，不中澡浴；亦如好華果樹，而多逆刺。若人雖在貴家生，身體端政<sup>26</sup>，廣學多聞，而不樂持戒，無慈愍心，亦復如是。如偈說：「貴而無智則為衰，智而僞慢亦為衰，持戒之人而毀戒，今世後世一切衰！」人雖貧賤而能持戒，勝於富貴而破戒者。

華香、木香不能遠聞；持戒之香，周遍十方。持戒之人，具足安樂，名聲遠聞，天人

<sup>25</sup> 比：18.副詞。先前，以前。15.副詞。近日，近來。(《漢語大詞典》(五)，p.258)

<sup>26</sup> 政：通「正」。(《漢語大詞典》(五)，p.422)「端政」即「端正」。

敬愛，現世常得種種快樂。若欲天上、人中、富貴、長壽，取之不難；持戒清淨，所願皆得。

**（四）持戒之人遠離刑罰、苦惱，得好名聞，壽終之時心不怖畏**

復次，持戒之人，見破戒人刑獄考<sup>27</sup>掠，種種苦惱，自知永離此事，以為欣慶。

若持戒之人，見善人得譽，名聞快樂，心自念言：「如彼得譽，我亦有分。」

持戒之人，壽終之時，刀風解身，筋脈斷絕，自知持戒清淨，心不怖畏。如偈說：

「大惡病中，戒為良藥；大恐怖中，戒為守護；  
死闇冥中，戒為明燈；於惡道中，戒為橋樑；  
死海水中，戒為大船。」

**（五）持戒之人眾人敬愛，衣食無缺，死得生天，後得佛道**

復次，持戒之人，常得今世人所敬養，心樂不悔，衣食無乏，死得生天，後得佛道。

持戒之人，無事不得；破戒之人，一切皆失。……

**（六）持戒之人，今世後世得好名聲周遍天上人中**

復次，持戒之人，名稱之香，今世、後世周滿天上及在人中。

**（七）持戒之人，世利無缺，得生天上、十方佛前，入三乘道而得解脫**

復次，持戒之人，人所樂施，不惜財物，不修世利而無所乏；得生天上、十方佛前，入三乘道而得解脫。唯種種邪見持戒，後無所得。

**（八）但行戒法亦得生天；若持淨戒，行禪定、智慧，欲脫眾苦，所願必得**

復次，若人雖不出家，但能修行戒法，亦得生天。若人持戒清淨，行禪、智慧，欲求度脫老、病、死苦，此願必得。

持戒之人，雖無兵仗，眾惡不加；持戒之財，無能奪者；持戒親親<sup>28</sup>，雖死不離；持戒莊嚴，勝於七寶。以是之故，當護於戒，如護身命，如愛寶物。

## 七、破戒之過失

《大智度論》卷 13 〈1 序品〉（大正 25，154b1-c6）：

持戒之人，觀破戒人罪，應自勉勵，一心持戒。云何名為破戒人罪？

- 〔1〕破戒之人，人所不敬，其家如塚，人所不到。
- 〔2〕破戒之人，失諸功德，譬如枯樹，人不愛樂。
- 〔3〕破戒之人，如霜蓮花，人不喜見。
- 〔4〕破戒之人，惡心可畏，譬如羅刹。
- 〔5〕破戒之人，人不歸向，譬如渴人，不向枯井。
- 〔6〕破戒之人，心常疑悔，譬如犯事之人，常畏罪至。
- 〔7〕破戒之人，如田被雹，不可依仰<sup>29</sup>。
- 〔8〕破戒之人，譬如苦菘，雖形似甘種而不可食。

<sup>27</sup> 考=拷【宋】【元】【明】【宮】\*。（大正 25，153d，n.23）

<sup>28</sup> 親親：4.至親，非常親愛。（《漢語大詞典》（十），p.350）

<sup>29</sup> 依仰：依賴仰仗。（《漢語大詞典》（一），p.1349）

- 〔9〕破戒之人，如賊聚落，不可依止。
- 〔10〕破戒之人，譬如大病，人不欲近。
- 〔11〕破戒之人，不得免苦，譬如惡道難可得過。
- 〔12〕破戒之人，不可共止<sup>30</sup>，譬如惡賊難可親近。
- 〔13〕破戒之人，譬如大<sup>31</sup>坑，行者避之。
- 〔14〕破戒之人，難可共住，譬如毒蛇。
- 〔15〕破戒之人，不可近觸，譬如大火。
- 〔16〕破戒之人，譬如破船，不可乘渡。
- 〔17〕破戒之人，譬如吐食，不可更噉。
- 〔18〕破戒之人，在好眾中，譬如惡馬在善馬群。
- 〔19〕破戒之人，與善人異，如驢在牛群。
- 〔20〕破戒之人，在精進眾，譬如憊兒<sup>32</sup>在健人中。
- 〔21〕破戒之人，雖似比丘，譬如死屍在眠人中。
- 〔22〕破戒之人，譬如偽珠在真珠中。
- 〔23〕破戒之人，譬如伊蘭在栴檀林。
- 〔24〕破戒之人，雖形似善人，內無善法；雖復剃頭、染衣，次第捉籌<sup>33</sup>，名為比丘，實非比丘。
- 〔25〕破戒之人，若著法衣，則是熱銅鐵鑠以纏其身；若持鉢盂，則是盛洋銅器；若所噉食，則是吞燒鐵丸，飲熱洋銅；若受人供養供給，則是地獄獄鬼守之；若入精舍，則是入大地獄；若坐眾僧床榻，是為坐熱鐵床上。
- 〔26〕復次，破戒之人，常懷怖懾，如重病人，常畏死至。亦如五逆罪人，心常自念「我為佛賊」，藏覆避隈<sup>34</sup>；如賊畏人，歲月日過，常不安隱。
- 〔27〕破戒之人，雖得供養利樂，是樂不淨；譬如愚人，供養莊嚴死屍，智者聞之，惡不欲見。

如是種種無量破戒之罪，不可稱說，行者應當一心持戒。

## 八、潔身自愛

《大智度論》卷 37〈3 習相應品〉（大正 25，332c10-14）：

是菩薩行畢竟不可得自相空故，於一切法中皆不著，不著故無違錯，無違錯故魔不能得其便。

譬如人身不瘡，雖臥毒屑中，毒亦不入；若有小瘡則死無疑。

<sup>30</sup> 止：3.居住。（《漢語大詞典》（五），p.299）

<sup>31</sup> 大=火【宋】【元】【明】【宮】。（大正 25，154d，n.8）

<sup>32</sup> （1）憊（ㄅㄨㄟˋ）兒：罵人之語，猶言孱頭。（《漢語大詞典》（一），p.1719）

（2）孱（ㄔㄢˋ）頭：1.卑劣怯懦的人。2.形容人品下劣懦怯。（《漢語大詞典》（四），p.239）

<sup>33</sup> 參見 Lamotte（1949，p.781，n.1）：籌（śalākā）係木片，其持有者能以之參與投票或受分配食物。投票稱為「捉籌」（śalākā grhṇāti）。

<sup>34</sup> 隈（ㄨㄞˋ）：5.隅，角落。（《漢語大詞典》（十一），p.1077）



## 九、觀懈怠之過失，增長精進

《大智度論》卷 15〈1 序品〉(大正 25, 173a24-b22)：

菩薩種種因緣，呵懈怠心，令樂著精進。懈怠黑雲，覆諸明慧，吞滅功德，增長不善。懈怠之人，初雖小樂，後則大苦；譬如毒食，初雖香美，久則殺人。懈怠之心，燒諸功德，譬如大火燒諸林野。懈怠之人失諸功德，譬如被<sup>35</sup>賊，無復遺餘。如偈說：

應得而不得，已得而復失，既自輕其身，眾人亦不敬。  
常處大闇中，無有諸威德，尊貴智慧法，此事永以失。  
聞諸妙道法，不能以益身，如是之過失，皆由懈怠心。  
雖聞增益法，不能得上及，如是之過罪，皆由懈怠心。  
生業<sup>36</sup>不修理<sup>37</sup>，不入於道法，如是之過失，皆由懈怠心。  
上智所棄遠，中人時復近，下愚為之沒，如猪樂在溷<sup>38</sup>。  
若為世中人，三事皆廢失，欲樂及財利，福德亦復沒。  
若為出家人，則不得二事，生天及涅槃，名譽二<sup>39</sup>俱失。  
如是諸廢失，欲知其所由，一切諸賊中，無過懈怠賊！  
以是眾罪故，懶心不應作，馬井二比丘<sup>40</sup>，懈怠墜惡道；  
雖見佛聞法，猶亦不自免<sup>41</sup>！

如是等種種觀懈怠之罪，精進增長。

## 十、三種思惟增益精進

《大智度論》卷 15〈1 序品〉(大正 25, 173c15-26)：

菩薩欲脫生、老、病、死，亦欲度脫眾生，常應精進一心不放逸。如人擎油鉢行大眾中，現前一心不放逸故，大得名利。又如偏閣<sup>42</sup>嶮<sup>43</sup>道，若懸繩，若乘山羊<sup>44</sup>——此諸惡道，以一心不放逸故，身得安隱，今世大得名利。求道精進，亦復如是，若一心不放逸，所願皆得。

復次，譬如水流，能決大石；不放逸心，亦復如是，專修方便，常行不廢，能破煩惱諸結使山。

<sup>35</sup> 被：12.蒙受，遭受，領受。(《漢語大詞典》(九)，p.55)

<sup>36</sup> 生業：1.猶生涯，職業。2.產業，資財。3.從事某種產業。(《漢語大詞典》(七)，p.1511)

<sup>37</sup> 修理：1.治理，3.操持，料理。5.處置。6.整治。(《漢語大詞典》(一)，p.1376)

<sup>38</sup> 溷(尸又ㄣ、)：8.圈，養牲畜禽獸之處。(《漢語大詞典》(六)，p.13)

<sup>39</sup> 參見 Lamotte (1949, p.937, n.1)：此即是指在家、出家二眾。

<sup>40</sup> 馬井二比丘：馬宿(Aśvaka, 阿說迦)比丘及井宿(或稱滿宿)比丘，為六群比丘中之二人。  
《薩婆多毘尼毘婆沙》卷 4：「六群比丘者：一、難途，二、跋難陀，三、迦留陀夷，四、闍那，五、馬宿，六、滿宿。云二人得漏盡入無餘涅槃：一、迦留陀夷，二、闍那。二人生天上，又云二人犯重戒，又云不犯，若犯重者不得生天也：一、難途，二、跋難陀。二人墮惡道生龍中：一、馬宿，二、滿宿。」(大正 23, 525c29-526a5)

<sup>41</sup> 免=勉【宋】【元】【明】【宮】。(大正 25, 173d, n.5)

<sup>42</sup> 閣(《ㄅノ)：2.棧道，複道。用木支架於空中而成的道路。(《漢語大詞典》(十二)，p.112)

<sup>43</sup> 嶮(丁一弓ノ)：1.險要，險阻，危險。(《漢語大詞典》(三)，p.869)

<sup>44</sup> 羊=崖【宋】【元】【明】【宮】【石】。(大正 25, 173d, n.13)

復次，菩薩有三種思惟：  
若我不作，不得果報；  
若我不自作，不從他來；  
若我作者，終不失。

如是思惟，當必精進，為佛道故，懃修專精而不放逸。<sup>45</sup>

## 十一、呵色欲

《大智度論》卷 17〈1 序品〉（大正 25，181b12-21）：

云何棄色？

觀色之患，若人著色，諸結使火盡皆熾然，燒害人身。如火燒金銀，煮沸熱蜜，雖有色味，燒身爛口，急應捨之。若人染著妙色、美味，亦復如是。

復次，好惡在人，色無定也。何以知之？如遙見所愛之人，即生喜愛心；若遙見怨家惡人，即生怒害心；若見中人，則無怒無喜。若欲棄此喜怒，當除邪念及色，一時俱捨；譬如洋金<sup>46</sup>燒身，若欲除之，不得但欲棄火而留金，要當金、火俱棄。

## 十二、比丘盜蓮花香

（一）《大智度論》卷 17〈1 序品〉（大正 25，181c22-p.182a6）：

有一比丘在林中蓮華池邊經行，聞蓮華香，其心悅樂，過而心愛。

池神語之言：「汝何以故捨彼林下禪淨坐處而偷我香？以著香故，諸結使臥者皆起。」

時，更有一人，來入池中，多取其花，掘挽根莖，狼籍<sup>47</sup>而去；池神默無所言。比丘言：「此人破汝池，取汝花，汝都無言；我但池岸邊行，便見呵罵，言偷我香！」

池神言：「世間惡人常在罪垢糞中，不淨沒頭，我不共語也。汝是禪行好人而著此香，破汝好事，是故呵汝！譬如白疊鮮淨而有黑物點污，眾人皆見；彼惡人者，譬如黑衣點墨，人所不見，誰問之者！」

如是等種種因緣，是名呵香欲。

（二）《雜阿含經》卷 50（1338 經）（大正 2，369a-b）。

（三）《別譯雜阿含經》卷 16（358 經）（大正 2，490c）。

<sup>45</sup> 三種思惟生精進  
┌ 我不作不得果  
├ 我不自作不從他來  
└ 我若作終不失

（印順法師，《大智度論筆記》〔A014〕p.28；〔A036〕p.69；〔I079〕p.482）

<sup>46</sup> 洋金：熔化的金屬。洋，通“烺”。（《漢語大詞典》（五），p.1183）

<sup>47</sup> （1）狼籍：見“狼藉”。（《漢語大詞典》（五），p.65）

（2）狼藉：1.縱橫散亂貌。《史記·滑稽列傳》：日暮酒闌，合尊促坐，男女同席，履舄交錯，杯盤狼藉。（《漢語大詞典》（五），p.64）

### 十三、除瞋恚

(一)《大智度論》卷 17〈1 序品〉(大正 25, 184a25-b22):

瞋恚蓋者，失諸善法之本，墮諸惡道之因，諸樂之怨家，善心之大賊，種種惡口之府藏。如佛教瞋弟子偈言：

#### 1、勸修慈心

汝當知思惟，受身及處胎，穢惡之幽苦，既生之艱難！  
既思得此意，而復不滅瞋，則當知此輩，則是無心人！  
若無罪報果，亦無諸呵責，猶當應慈忍，何況苦果劇！  
當觀老病死，一切無免者；當起慈悲心，云何惡加物？  
眾生相怨賊，斫刺受苦毒；云何修善人，而復加惱害？  
常當行慈悲，定心修諸善；不當懷惡意，侵害於一切！  
若勤修道法，惱害則不行，善惡勢不竝，如水火相背。

#### 2、瞋恚之相

瞋恚來覆心，不知別好醜，亦不識利害，不知畏惡道。  
不計他苦惱，不覺身心疲，先自受苦因，然後及他人。

#### 3、慈滅瞋毒

若欲滅瞋恚，當思惟慈心，獨處自清閑，息事滅因緣。  
當畏老病死，九種瞋惱<sup>48</sup>除，如是思惟慈，則得滅瞋毒！  
如是等種種因緣，除瞋恚蓋。

(二)《長阿含經》卷 9 (第 10 經)《十上經》(大正 1, 56b11-19):

云何九退法？謂九惱法：

- (1) 有人已侵惱我，(2) 今侵惱我，(3) 當侵惱我；
- (4) 我所愛者，已侵惱，(5) 今侵惱，(6) 當侵惱；
- (7) 我所憎者，已愛敬，(8) 今愛敬，(9) 當愛敬。

云何九增法？謂無惱：

- (1-3) 彼已侵我，我惱何益？已不生惱，今不生惱，當不生惱；
- (4-6) 我所愛者，彼已侵惱，我惱何益？已不生惱，今不生惱，當不生惱；
- (7-9) 我所憎者，彼已愛敬，我惱何益？已不生惱，今不生惱，當不生惱。

### 十四、修福業、修聖道

(一)《大智度論》卷 22〈1 序品〉(大正 25, 225a20-b9):

佛一時舍婆提乞食，有一婆羅門姓婆羅埵逝，佛數數<sup>49</sup>到其家乞食；心作是念：「是沙門何以來數數，如負其債？」

佛時說偈：

<sup>48</sup> 《長阿含經》卷 9 (第 10 經)《十上經》(大正 1, 56b11-14)。

<sup>49</sup> 數數(尸メ丕、尸メ丕、)：2.屢次，常常。(《漢語大詞典》(五)，p.510)

「時雨<sup>50</sup>數數墮，五穀數數成；數數修福業，數數受果報。

數數受生法，故受數數死；聖法數數成，誰數數生死？」<sup>51</sup>

婆羅門聞是偈已，作是念：「佛大聖人，具知我心。」慚愧取鉢入舍，盛滿美食以奉上佛。

佛不受，作是言：「我為說偈故得此食，我不食也！」

婆羅門言：「是食當與誰？」

佛言：「我不見天及人能消是食者，汝持去，置少草地、若無虫水中！」

即如佛教，持食著無虫水中，水即大沸，煙火俱出，如投大熱鐵。婆羅門見已驚怖言：「未曾有也！乃至食中神力如是！」還到佛所，頭面禮佛足懺悔，乞出家受戒。

佛言：「善來！」即時鬚髮自墮，便成沙門；漸漸斷結，得阿羅漢道。

(二)《雜阿含經》卷42(1157經)(大正2, 308a3-b19)。

(三)《別譯雜阿含經》卷4(80經)(大正2, 401b11-c19)。

## 十五、菩薩永離口過，不說無益語，唯說利益相應語

(一)《大智度論》卷39〈4 往生品〉(大正25, 343c20-29)：

【經】舍利弗！有菩薩摩訶薩住六波羅蜜，常勤精進，利益眾生，不說無益之事。

【論】釋曰：

是菩薩先有惡口故，發菩薩心願言：「我永離口四過，行是道。」

復次，此菩薩知是般若波羅蜜中諸法，無有定相，不可著、不可說相故。如是知能利益者，皆是佛法；若不能利益，雖種種好語，非是佛法。譬如種種好藥，不能破病，不名為藥；趣得土泥等能差病者，是名為藥。

以是故，恐其謬錯故，不說無益之事。

<sup>50</sup> 時雨：應時的雨水。(《漢語大詞典》(五)，p.697)

<sup>51</sup> (1) 參見《雜阿含經》卷42(1157經)(大正2, 308a11-21)：

王天日日雨，田夫日夜耕，數數殖種子，是田數收穀。

如人數懷妊，乳牛數懷犢，數數有求者，則能數惠施。

數數惠施故，常得大名稱，數數棄死屍，數數哭悲戀。

數數生數死，數數憂悲苦，數數以火燒，數數諸蟲食。

若得賢聖道，不數受諸有，亦不數生死，不數憂悲苦，不數數火燒，不數諸蟲食。

(2) 參見《別譯雜阿含經》卷4(80經)(大正2, 401b19-c5)：

天雨數數降，五穀數數熟，道人數數乞，檀越數數與。

數數生天上，數數受果報，婦女數懷妊，數數生子息。

數數擊牛乳，數數得酥酪，數數受於生，數數消滅盡。

數數至於死，數數悲苦惱，亦復數數燒，數數埋塚墓。

得斷後有道，則止不數數；若不數數生，亦不數數死；得不數數憂，亦不數號哭。

(二)《大智度論》卷 73〈55 阿毘跋致品〉(大正 25, 571c6-14):

得畢竟空故，心淳熟寂滅相，不說無益語。

所說常是法，不是非法；

所說皆實，非妄語；

所言柔軟，不麤穢；

皆以慈悲心說，不以瞋恚心。

所說應時，常得機會，觀察人心，隨其方俗。<sup>52</sup>

今此中略說利益之言：若教佛道，若二乘，若人天道，若今世得非罪樂；常遠離口四惡故，於眾生中慈悲心大故，又能自摧薄諸煩惱故——是以能種種因緣說諸利益語。

## 十六、五度殖諸功德，般若除其著心邪見

《大智度論》卷 29 (大正 25, 272c2-4):

復次，五波羅蜜殖<sup>53</sup>諸功德，般若波羅蜜除其著心、邪見。

如一人種穀，一人芸<sup>54</sup>除眾穢，令得增長，果實成就。

## 十七、「身苦」與「心苦」

《大智度論》卷 23 (大正 25, 229c22-230a18) :

### (一) 一切有為法無常，愛著則生苦

苦想者，行者作是念：一切有為法無常故苦！

問曰：若有為法無常故苦者，諸賢聖人有為無漏法，亦應當苦！

答曰：諸法雖無常，愛著者生苦，無所著者無苦！

### (二) 聖人有身苦無心苦 (印順法師，《大智度論筆記》[A043] p.81)

問曰：有諸聖人雖無所著，亦皆有苦，如舍利弗風熱病苦，畢陵伽婆蹉眼痛苦，羅婆那跋提(音聲第一也)痔病苦，云何言無苦？

答曰：有二種苦：一者、身苦，二者、心苦。

是諸聖人以智慧力故，無復憂愁、嫉妬、瞋恚等心苦；已受先世業因緣四大造身，有老病、飢渴、寒熱等身苦。於身苦中亦復薄少，如人了了知負他債，償之不以為苦；若人不憶負債，債主強奪，瞋惱生苦。

### (三) 凡夫受身心苦如二箭雙射 (印順法師，《大智度論筆記》[C002] p.379)

問曰：苦受是心心數法，身如草木，離心則無所覺，云何言聖人但受身苦？

答曰：凡夫人受苦時，心生愁惱，為瞋使所使，心但向五欲。如佛所說：凡夫人除五欲不知更有出苦法，於樂受中，貪欲使所使；不苦不樂受中，無明使所使；

<sup>52</sup> 參見《雜阿含經》卷 18 (497 經)(大正 2, 129b28-c3):

佛告舍利弗：「若比丘令心安住五法，得舉他罪。云何為五？實，非不實；時，不非時；義饒益，非非義饒益；柔軟，不麤澁；慈心，不瞋恚。舍利弗！舉罪比丘具此五法，得舉他罪。」

<sup>53</sup> 殖=植【宋】【元】【明】【宮】。(大正 25, 272d, n.17)

<sup>54</sup> 芸=耘【宋】【元】【明】【宮】。(大正 25, 272d, n.18)

凡夫人受苦時，內受三毒苦，外受寒熱、鞭杖等。如人內熱盛，外熱亦盛。如經說：「凡夫人失所愛物，身、心俱受苦，如二箭雙射；諸賢聖人無憂愁苦，但有身苦，更無餘苦。」<sup>55</sup>……

復次，我言有為無漏法，不著故非苦；<sup>56</sup>聖人身是有漏，有漏法則苦，有何咎？是末後身所受苦亦微少。

## 十八、有身皆苦

《大智度論》卷 19〈1 序品〉(大正 25, 199b6-25)：

是身是眾苦生處，如水從地生，風從空出，火因木有，是身如是，內外諸苦皆從身出。內苦名老、病、死等；外苦名刀杖、寒熱、飢渴等，有此身故有是苦。

問曰：身非但是苦性，亦從身有樂；若令無身，隨意五欲，誰當受者？  
答曰：

**〔一〕止大苦故，小苦為樂**<sup>57</sup> (印順法師，《大智度論筆記》〔A017〕 p.31)

四聖諦苦，聖人知實是苦，愚夫謂之為樂<sup>58</sup>；聖實可依，愚惑宜棄。

是身實苦，以止大苦故，以小苦為樂。譬如應死之人，得刑罰代命，甚大歡喜；罰實為苦，以代死故，謂之為樂。

**〔二〕故苦為苦，新苦為樂** (印順法師，《大智度論筆記》〔A017〕 p.31)

復次，新苦為樂，故苦為苦。如初坐時樂，久則生苦；初行、立、臥亦樂，久亦為苦。屈申、俯仰，視眴<sup>59</sup>、喘息，苦常隨身；從初受胎，出生至死，無有樂時。

**〔三〕姪樂似樂，大苦轉深** (印順法師，《大智度論筆記》〔A017〕 p.31)

若汝以受姪欲為樂，姪病重故，求外女色，得之愈多，患至愈重；如患疥病，向火措<sup>60</sup>炙，當時小樂，大痛轉深。如是小樂，亦是病因緣故有，非是實樂，無病觀之，為生慈愍；離欲之人觀姪欲者，亦復如是，愍此狂惑為欲火所燒，多受多苦。

如是等種種因緣，知身苦相、苦因。

<sup>55</sup> 參見《雜阿含經》卷 10 (470 經) (大正 2, 119c28-120b15)。

<sup>56</sup> 《大智度論》卷 23 (大正 25, 230a19-23)：

問曰：「若無常即是苦者，道亦是苦，云何以苦離苦？」

答曰：「無常即是苦，為五受眾故說；道雖作法故無常，不名為苦。所以者何？是能滅苦，不生諸著，與空、無我等諸智和合故，但是無常而非苦。」

<sup>57</sup> 受：真實是苦，止大苦，小苦為樂；故苦去、新苦為樂；姪樂大苦。(印順法師，《大智度論筆記》〔A059〕 p.100)

<sup>58</sup> 止大苦故，小苦為樂—愚惑以之為樂

樂受是苦—故苦為苦，新苦為樂—

姪樂似樂，大苦轉深—聖人知實是苦 (印順法師，《大智度論筆記》〔A017〕 p.31)

總—聖實可依，愚惑宜棄

實無樂—以止大苦，小苦為樂

別—新苦為樂，故苦為苦

姪樂大苦，如炙疥病 (印順法師，《大智度論筆記》〔A031〕 p.59)

<sup>59</sup> 眴 (尸メㄣ)：1.看，眨眼。2.目轉動示意。(《漢語大詞典》(七)，p.1204)

<sup>60</sup> 措 (巧𠂔)：1.摩擦，拭抹。(《漢語大詞典》(六)，p.740)